



UPA 2014/158

Inatsisartut suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Inuusuttut inersimasullu innarluutillit atuartinneqarnissaannut, ilinniagaqalernissaannut suliffeqarnissaannullu kommunit inatsisit atuuttut naapertorlugit sunik pisussaaffeqarnerannik Naalackersuisut erseqqissaassuteqaqqullugit Inatsisartut aalajangiiffigisassaattut siunnersuut.

(Inatsisartunut ilaasorta q Agathe Fontain, Inuit Ataqatigiit)

Tungavilersuut

Inuusuttut inersimasulluunniit innarluutillit immikkut pisariaqartitsisut, ullumikkut inatsisit atuuttut naapertorlugit inuiaqatigiinni allatuulli inatsisisitigut aamma atuartinneqarnissamut, suliffeqalernissamut imaluunniit ilinniagaqalernissamut periarfissaqartitaapput pisinnaati-taaffeqarlutillu.

Innarluutillit atuartinneqarnissaat suliffeqarnissaallu eqqarsaatigalugit ullumikkut kommunit immikkut pisussaaffeqareerput, taamaalillutillu innarluutilittatik immikkut ataasiakkaarlugit pilersaarusiuttussaareerlugit aammalu siunnersorlugillu ilitsersuuttussaareerlugit il.il.

Tamannali kommunit ulloq manna tikillugu naammaginatsumik naammassisangikkaat tamatta ilisimagunarpaput, innarluutilippassuit siusinaartumik soraarnerussutisiassanik kommunenit pisartagaqartiinnarneqarnerannik kinguneqartartumik, atuartinneqaratik, ilin-niartinneqaratik sulitinneqaratilluunniit.

Taamaattumik innarluutillit atuartinneqarnissaminnut, ilinniagaqarnissaminnut suliffeqar-nissaminnullu inatsisitigut pisinnaatitaaffeqareernerat negeroorfigineqartarnissaallu kommu-nenit pisussaaffigineqareernerat Naalackersuisuniit erseqqissaavigineqartariaqarsorivara, neriuppungalu tamanna partiinit allanit aamma ilalerneqarumaartoq.

Pisortani aningaasaqarnikkut allaffissornikkullu kingunerisassa

Inatsisit pioreersut kommunenut erseqqissaassutigineqarnissaat matumani siunnersuummi pineqarmata pisortanut aningaasartuutissat killeqarnissaat ilimagineqarpoq.

Namminersorlutik inuussutissarsiortunut aningaasaqarnikkut allaffissornikkullu kingunerisassa

Namminersorlutik inuussutissarsiortunut aningaasaqarnikkut allaffissornikkullu kinguneqas-sangilaq.

Innuttaasunut aningaasaqarnikkut allaffissornikkullu kingunerisassa

Kommunit inatsisit atuuttut naapertorlugit pisussaaffeqarnertik naammassisinnaan-ngorunikku tamanna innarluutillit sullinneqarnerannut iluaqutaassaaq.